

COMUNICATO n. 2773 del 03/10/2025

Van Trentin vonks u' der prais Arge Alp: lait ont schualn hauspiler keing de pfèrlechkaitn van bösser

[Mòcheno] De autonome Provinz va Trea't ist vour en nai projekt as keart en de Òrbetgamoas'chèft va Arge Alp, as van genner 2026 bart schaug za learnen u' de lait en de praich za hom keing de pfèrlechkaitn van bösser. De doi naiòrbet, tschbunnen van Dipartiment Zivilschutz, balder ont vicher va de autonome Provinz va Trea't, hòt schoa' de vourderlab kriak van Regiar Komitat va de Òrbetgamoas'chèft van alpine region ont de bart kemmen u'ganommen bail der Zòmmtrèff van Stòtt Viarer va Arge Alp as bart se hòltn ka Trea't as de viaraontzboa'sk van schanmikeal.

De vourtschbinn as voursteat en projekt kimm van kennen de schutzòrbetn - zan paispil de zain, de grenz, de schutzschneala' - meing nèt leschn de idrogeologeschn pfèrlechkaitn. De teknologi ont de infrastruktur, sai' nèt ganua ver za versichern de sicherkait benn as s tea' va òll oa's mu' pfèrlech sai' ont schlèchta nutz gem. S kimm asou bichte sai' klor ont mòchen kennen de sòchen, asou za hèlven en de lait za bissn de pfèrlechkaitn ont asou tea' de rèchtn dinger benn as noat ist. "Schutzn van idrogeologeschn pfèrlechkaitn ist moglech lait benns òll oa's van ins nimmp toal en de voursicherkait - unterstraicht der iberschauer van projekt Stefano Fait, iberòllviarer van Dipartiment Zivilschutz, balder ont vicher va de autonome Provinz va Trea't - Pet de doi òrbet bill ber aupaun a nais bissn, drinn nemmen de lait ont de innrichtn en an be as en de mitt leuk de sicherkait ont s vourstea' van a gònza gamoa'schèft".

Der Trentin hòt schoa' gamòcht de doi òrbet gèltsgott en europeische projekt LIFE FRANCA, as hòt naia strumentn va nochrichtn ont toalnemm gem, ont s hòt innganommen de amministratorn van plòtz, de familie ont de studentn. Runt bichte ist gaben de òrbet gamòcht pet de kinder va de zbaite schual va earste tritt, as pet bèrkn ont plinder ver za learnen - gor pet a rachl gamòcht ver dös - hom gameicht learnen abia za tea' rècht ont mòchen s bissn gor en de groasn.

Der nai projekt, u'gahenk en Strategische Programm Arge Alp asn tema "Vourregiar van natural pfèrlechkaitn ont van katastrofe", bart gem de moglechkait za leing en sistem de doin dinger, verglaichern sa pet de sèlln va òndra alpine regionen ont vergreasern zòmmstrategi va nochrichtn. Trentin, Lombardia, Tirol, Salzburg, Canton Ticino ont Sudtirol barn òrbetn zòmm, pet de hilf van Baiern, Grigioni ont Vorarlberg, ver za oa'ne leing se abia za klòffen ont de strumentn za prauchen, asou za paun kulturaln zòmm burzn as versterchert de gònze gamoa'schèft va de alpn.

Bail de zboa jor va de òrbetn barn kemmen organisart momentn ver za zòmmklòffen zbischn techiker ont amministratorn, mòchen workshop ver de lait ont iniziativen dirèkt ver de bèlt va de schual, finz en rivtrèff as bart long schau sèll as ist araus kemmen van òrbetn. Der gònze projekt, zuazolt van Arge Alp ver an total va 120.000 va euro, ist a bichtekait ver de òrbetn as toalmòchen va de òrbetgamoas'chèft, as leuk en zentrum s bèrt van schutzn de umbèlt, s gabeng se en de bècksln van bètter ont learnen en de nain generazioni.

Arge Alp ist an òrbetgamoaschòft pagrunt as de zbelva van schanmikeal 1972 ka Mösern en Tirol, pet en zil za stitzn de neat van alpineplatz as enteressiarn ungefèr secksaontzboa'sk milionen va lait. S sai' toalnemmer va Arge Alp s Taitschlònt pet en Vraistòtt va Baiern, s Osteraich pet de Länder van Vorarlberg, van Tirol ont va Sòlzburg, s Baltschlònt pet de autonome Provinzn va Poazn ont va Trea't ont de Region Lombardia, de Schbaiz pet de Kantonen van Grigioni, van San Gallen ont van Ticino.

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)